



史 记

(四)

◎ ◎ ◎ ◎ ◎

刘佑平

〔唐〕

〔唐〕

〔宋〕

〔汉〕

张守节

司马贞

裴 駰

司马迁

整理 正义 索隐 集解 著

卷九十六

张丞相列传第三十六

张丞相苍者，阳武人也。（〔索隐〕按：县名，属陈留。〔正义〕郑州阳武县也。）好书律历。秦时为御史，主柱下方书。（〔集解〕如淳曰：“方，版也，谓书事在版上者也。秦以上置柱下史，苍为御史，主其事。或曰四方文书。”〔索隐〕周、秦皆有柱下史，谓御史也。所掌及侍立恒在殿柱之下，故老聘为周柱下史。今苍在秦代亦居斯职。方书者，方板，谓小事书之于板也。或曰：主四方文书也。姚氏以为下云“明习天下图书计籍，主郡上计”，则方为四方文书是也。）有罪，亡归。及沛公略地过阳武，苍以客从攻南阳。苍坐法当斩，解衣伏质，（〔索隐〕小颜云：“质，榘也。”）身长大，肥白如瓠，时王陵见而怪其美士，乃言沛公，赦勿斩。遂从西入武关，至咸阳。沛公立为汉王，入汉中，还定三秦。陈馥击走常山王张耳，耳归汉，汉乃以张苍为常山守。从淮阴侯击赵，苍得陈馥。赵地已平，汉王以苍为代相，备边寇。已而徙为赵相，相赵王耳。耳卒，相赵王敖。复徙相代王。燕王臧荼反，高祖往击之，苍以代相从攻臧荼有功，以六年中封为北平侯，食邑千二百户。

迁为计相，（〔集解〕文颖曰：“能计，故号曰计相。”）一月，更以列侯为主计四岁。（〔集解〕张晏曰：“以列侯典校郡国簿书。”如淳曰：“以其所主，因以为官号，与计相同。时所卒立，非久施也。”〔索隐〕谓改计相之名，更名主计也。此盖权时立号也。）是时萧何为相国，而张苍乃自秦时为柱下史，明习天下图书计籍。苍又善用算律历，故令苍以列侯居相府，领主郡国上计者。黥布反亡，汉立皇子长为淮南王，而张苍相之。十四年，迁为御史大夫。



周昌者，沛人也。其从兄曰周苛，秦时皆为泗水卒史。及高祖起沛，击破泗水守监，于是周昌、周苛自卒史从沛公，沛公以周昌为职志，（〔集解〕徐广曰：“主旗帜之属。”〔索隐〕官名也。职，主也。志，旗帜也。谓掌旗帜之官也。音昌志反。）周苛为客。（〔集解〕张晏曰：“为帐下宾客，不掌官。”）从入关，破秦。沛公立为汉王，以周苛为御史大夫，周昌为中尉。

汉王四年，楚围汉王荥阳急，汉王遁出去，而使周苛守荥阳城。楚破荥阳城，欲令周苛将。苛骂曰：“若趣降汉王！不然，今为虏矣！”项羽怒，烹周苛。（〔集解〕徐广曰：“四年三月也。”）于是乃拜周昌为御史大夫。常从击破项籍。以六年中与萧、曹等俱封：封周昌为汾阴侯；周苛子周成以父死事，封为高景侯。（〔集解〕徐广曰：“九^{〔1〕}年封，封三十九年，文帝后元四年谋反死，国除。”）

昌为人强力，敢直言，自萧、曹等皆卑下之。昌尝燕时入奏事，（〔集解〕《汉书音义》曰：“以上宴时入奏事。”）高帝方拥戚姬，昌还走，高帝逐得，骑周昌项，问曰：“我何如主也？”昌仰曰：“陛下即桀纣之主也。”于是上笑之，然尤惮周昌。及帝欲废太子，而立戚姬子如意为太子，大臣固争之，莫能得；上以留侯策即止。而周昌廷争之强，上问其说，昌为人吃，又盛怒，曰：“臣口不能言，然臣期期知其不可。（〔正义〕昌^{〔2〕}以口吃，每语故重言期期也。）陛下虽欲废太子，臣期期不奉诏。”上欣然而笑。既罢，吕后侧耳于东厢听，（〔集解〕韦昭曰：“殿东堂也。”〔索隐〕小颜云：“正寝之东西室皆号曰箱，言似箱篋之形。”）见周昌，为跪谢曰：“微君，太子几废。”（〔索隐〕几，矩依反。）

是后戚姬子如意为赵王，年十岁，高祖忧即万岁之后不全也。赵尧年少，为符玺御史。赵人方与公（〔集解〕孟康曰：“方与，县名；公，其号。”〔正义〕曰：“方与县令也。”）谓御史大夫周昌曰：“君之史赵尧，年虽少，然奇才也，君必异之，是且代君之位。”周昌笑曰：“尧年少，刀笔吏耳，（〔正义〕古用简牍^{〔3〕}，书有错谬，以刀削之，故曰“刀笔吏”。）何能

至是乎！”居顷之，赵尧侍高祖。高祖独心不乐，悲歌，群臣不知上之所以然。赵尧进请问曰：“陛下所为不乐，非为赵王年少而戚夫人与吕后有郤邪？备万岁之后而赵王不能自全乎？”高祖曰：“然。吾私忧之，不知所出。”（〔索隐〕谓不知其计所出也。）尧曰：“陛下独宜为赵王置贵强相，及吕后、太子、群臣素所敬惮乃可。”高祖曰：“然。吾念之欲如是，而群臣谁可者？”尧曰：“御史大夫周昌，其人^{〔4〕}坚忍质直，且自吕后、太子及大臣皆素敬惮之。独昌可。”高祖曰：“善。”于是乃召周昌，谓曰：“吾欲固烦公，公强为我相赵王。”（〔正义〕桓谭^{〔5〕}《新^{〔6〕}论》云：“使周相赵，不如使取吕后家女为妃，令戚夫人善事吕后，则如意无毙也。”）周昌泣曰：“臣初起从陛下，陛下独奈何中道而弃之于诸侯乎？”高祖曰：“吾极知其左迁，（〔索隐〕《诸侯王表》有左官之律。韦昭以为：“左犹下也，禁不得下仕于诸王也。”然地道尊右，右贵左贱，故谓贬秩为“左迁”。他皆此类。）然吾私忧赵王，念非公无可者。公不得已强行！”于是徙御史大夫周昌为赵相。

既行久之，高祖持御史大夫印弄之，曰：“谁可以为御史大夫者？”孰视赵尧，曰：“无以易尧。”遂拜赵尧为御史大夫。（〔集解〕徐广曰：“十年也。”）尧亦前有军功食邑，及以御史大夫从击陈豨有功，封为江邑侯。（〔集解〕徐广曰：“十一年。”）

高祖崩，吕太后使使召赵王，其相周昌令王称疾不行。使者三反，周昌固为不遣赵王。于是高后患之，乃使使召周昌。周昌至，谒高后，高后怒而骂周昌曰：“尔不知我之怨戚氏乎？而不遣赵王，何？”昌既征，高后使使召赵王，赵王果来。至长安月余，饮药而死。周昌因谢病不朝见，三岁而死。（〔集解〕徐广曰：“谥悼也。”〔索隐〕《汉书》列传及表咸言周昌谥悼，韦昭云“或谥惠”，非也。《汉书》又曰：“传子至孙意，有罪，国除。景帝复封昌孙左车为安阳侯，有罪，国除”。）

后五岁，（〔正义〕高后之年。）高后闻御史大夫江邑侯赵尧高祖时定赵王如意之画，乃抵尧罪，（〔集解〕徐广曰：“吕后元年，国除。”）以广阿侯任敖为御史大夫。

任敖者，故沛狱吏。高祖尝辟吏，（〔正义〕上音避。）吏系吕后，遇之不谨。任敖素善高祖，怒，击伤主吕后吏。及高祖初起，敖以客从为御史，守丰二岁。高祖立为汉王，东击项籍，敖迁为上党守。陈豨反时，敖坚守，封为广阿侯，食千八百户。高后时为御史大夫。三岁免^[7]，（〔集解〕徐广曰：“文帝二年，任敖卒，谥懿侯。曾孙越人，元鼎二年为太常，坐酒酸，国除。”骃按：《汉书》：任敖，孝文元年薨，徐误也。〔索隐〕此^[8]徐氏据《汉书》为说^[9]，而误云“二年”，裴骃又引《任安书》证，为得其实。〔正义〕按：《史记》书、表云：孝文二年卒。《汉表》又云：封十九^[10]年卒。计高祖十一年封，到文帝二年则十九年矣。而《汉书》误，裴氏不考，乃云徐误，何其貳过也！）以平阳侯曹窋为御史大夫。高后崩，不与大臣共诛吕禄等，免。以淮南相张苍为御史大夫。

苍与绛侯等尊立代王为孝文皇帝。四年，丞相灌婴卒，张苍为丞相。

自汉兴至孝文二十余年，会天下初定，将相公卿皆军吏。张苍为计相时，绪正律历。（〔集解〕文颖曰：“绪，寻也。或曰：绪，业也。”）以高祖十月始至霸上，因故秦时本以十月为岁首，弗革。推五德之运，以为汉当水德之时，尚黑如故。（〔正义〕姚察云：“苍是秦人，犹用推五胜之法，以周赤乌为火，汉胜火以水也。”）吹律调乐，入^[11]之音声，及以比定律令。（〔集解〕如淳曰：“比谓五音清浊，各有所比也。以定十二月律之法令于乐官，使长行之。”瓚曰：“谓以比故取类，以定法律与条令也。”〔正义〕比，音鼻，或音必履反，谓比方也。）若百工，天下作程品。（〔集解〕如淳曰：“若，顺也。百工为器物皆有尺寸斤两，皆使得宜，此之谓顺。”晋灼曰：“若，预及之辞。”〔索隐〕晋灼说为得。）至于为丞相，卒就之，故汉家言律历者，本之张苍。苍本好书，无所不观，无所不通，而尤善律历。（〔集解〕《汉书》曰：“著书十八篇，言阴阳律历事。”）

张苍德王陵。王陵者，安国侯也。及苍贵，常父事王陵。陵死后，苍为丞相，洗沐，常先朝陵夫人上食，然后敢归家。

苍为丞相十余年，鲁人公孙臣上书言汉土德时，其符有黄龙当见。诏下其议张苍，张苍以为非是，罢之。其后黄龙见成纪，于是文帝召公孙臣以为博士，草土德之历制度，更元年。张丞相由此自绌，谢病称老。苍任人为中候，（〔集解〕张晏曰：“所选保任者也。”瓚曰：“中候，官名。”）大为奸利，上以让苍，苍遂病免。苍为丞相十五岁而免。孝景前五年，苍卒，谥为文侯。子康代侯，八年卒。子类（〔集解〕徐广曰：“一作‘顓’，音瓚。”）代为侯，八年，坐临诸侯丧后就位不敬，国除。（〔索隐〕按：《汉书》云：传子，至孙毅，有罪，国除。今此文康代，八年卒，子顓代侯，则顓即类也，与《汉书》略同也。）

初，张苍父长不满五尺，及生苍，苍长八尺余，为侯、丞相。苍子复长。（〔集解〕《汉书》云：“长八尺。”）及孙类，长六尺余，坐法失侯。苍之免相后，老，口中无齿，食乳，女子为乳母。妻妾以百数，尝孕者不复幸。苍年百有余岁而卒。

申屠丞相嘉者，梁人，以材官蹶张（〔集解〕徐广曰：“勇健有材力开张。”驺按：如淳曰：“材官之多力，能脚踏强弩张之，故曰‘蹶张’。律有蹶张士。”〔索隐〕孟康云：“主张强弩。”蹶，音其月反。《汉令》曰：“蹶张士百人也。”）从高帝击项籍，迁为队率。（〔索隐〕所类反。）从击黥布军，为都尉。孝惠时，为淮阳守。孝文帝元年，举故吏士二千石从高皇帝者，悉以为关内侯，食邑二十四人，而申屠嘉食邑五百户。张苍已为丞相，嘉迁为御史大夫。张苍免相，（〔集解〕徐广曰：“后二年八月。”）孝文帝欲用皇后弟窦广国为丞相，曰：“恐天下以吾私广国。”广国贤有行，故欲相之，念久之不可，而高帝时大臣又皆多死，余见无可者，乃以御史大夫嘉为丞相，因故邑封为故安侯。（〔正义〕今易州界武阳城中东南隅故城是也。）

嘉为人廉直，门不受私谒。是时太中大夫邓通方隆爱幸，赏赐累



巨万。文帝尝燕饮通家，其宠如是。是时丞相入朝，而通居上傍，有怠慢之礼。丞相奏事毕，因言曰：“陛下爱幸臣，则富贵之；至于朝廷之礼，不可以不肃！”上曰：“君勿言，吾私之。”罢朝坐府中，嘉为檄召邓通诣丞相府，不来，且斩通。通恐，入言文帝。文帝曰：“汝第往，吾今使人召若。”通至丞相府，免冠，徒跣，顿首谢。嘉坐自如，故不为礼，责曰：“夫朝廷者，高皇帝之朝廷也。通小臣，戏殿上，大不敬，当斩。吏今行斩之！”（〔集解〕如淳曰：“嘉语其吏曰：‘今便行斩之。’”）通顿首，首尽出血，不解。文帝度丞相已困通，使使者持节召通，而谢丞相曰：“此吾弄臣，君释之。”邓通既至，为文帝泣曰：“丞相几杀臣。”

嘉为丞相五岁，孝文帝崩，孝景帝即位。二年，晁错为内史，贵幸用事，诸法令多所请变更，议以谪罚侵削诸侯。而丞相嘉自绌所言不用，疾错。错为内史，门东出，不便，更穿一门南出。南出者，太上皇庙堧垣。（〔集解〕服虔曰：“宫外垣也。”如淳曰：“堧，音‘畏慎’之‘慎’。”〔索隐〕慎，音乃唤反，韦昭音而缘反，又音软。）嘉闻之，欲因此以法错擅穿宗庙垣为门，奏请诛错。错客有语错，错恐，夜入宫上谒，自归景帝。（〔正义〕自归帝首露。）至朝，丞相奏请诛内史错。景帝曰：“错所穿非真庙垣，乃外堧垣，故他官居其中，（〔索隐〕《汉书》作“冗官”，谓散官。）且又我使为之，错无罪。”罢朝，嘉谓长史曰：“吾悔不先斩错，乃先请之，为错所卖。”至舍，因欧血而死。溢为节侯。子共侯蔑代，三年卒。子侯去病代，三十一年卒。（〔集解〕徐广曰：“一本无此去病，而云‘共侯蔑三十三年，子吏改封靖安侯。’”）子侯臾代，六岁，坐为九江太守受故官送有罪，国除。

自申屠嘉死之后，景帝时开封侯陶青、桃侯刘舍^[12]为丞相。（〔集解〕徐广曰：“陶青，高祖功臣陶舍^[13]之子也，溢夷。刘舍^[14]，本项氏亲也，赐姓刘氏。父襄，佐高祖有功。舍^[15]溢哀侯。”）及今上时，柏至侯许昌、（〔集解〕徐广曰：“高祖功臣许温之孙，溢哀侯。”）平棘侯薛泽、（〔集解〕徐广曰：“高祖功臣广平侯薛欧之孙平棘节侯薛泽。”）武强侯

庄青翟、〔〔集解〕徐广曰：“高祖功臣庄不识之孙。”〕高陵侯赵周〔〔集解〕徐广曰：“周父夷吾为楚王戊太傅，谏争而死。”〕等为丞相。皆以列侯继嗣，娓娓〔〔集解〕徐广曰：“娓娓，音七角反。一作‘断’，一作‘靛’。”〔索隐〕娓娓，音侧角反。小颜云：“持整之貌。”《汉书》作“靛”，靛，音初角反。断，音都乱反，义如《尚书》“断断猗无他技”。〕廉谨，为丞相备员而已，无所能发明功名有著于当世者。

太史公曰：张苍文学律历，为汉名相，而绌贾生、公孙臣等言正朔服色事而不遵，明用秦之《颛顼历》，何哉？〔〔集解〕张晏曰：“不考经典，专用《颛顼历》，何哉？”〕周昌，木强人也。〔〔正义〕言其质直掘强如木石焉。〕任敖以旧德用。〔〔集解〕张晏曰：“谓伤辱吕后吏。”〕申屠嘉可谓刚毅守节矣，然无术学，殆与萧、曹、陈平异矣。

孝武时丞相多甚，不记，莫录其行起居状略，且纪征和以来。

有车丞相，长陵人也。〔〔集解〕名千秋。〕卒，而有韦丞相代。〔〔索隐〕自车千秋已下，皆褚先生等所记。然《丞相传》都省略，《汉书》则备。〕

韦丞相贤者，鲁人也。以读书术为吏，至大鸿胪。有相工相之，当至丞相。有男四人，使相工相之，至第二子，其名玄成。相工曰：“此子贵，当封。”韦丞相言曰：“我即为丞相，有长子，是安从得之？”后竟为丞相，病死，而长子有罪论，不得嗣，而立玄成。玄成时佯狂，不肯立，竟立之，有让国之名。后坐骑至庙，不敬，有诏夺爵一级，为关内侯，失列侯，得食其故国邑。韦丞相卒，有魏丞相代。

魏丞相相者，济阴人也。以文吏至丞相。其人好武，皆令诸吏带剑，带剑前奏事。或有不带剑者，当入奏事，至乃借剑而敢入



奏事。其时京兆尹赵君，（〔集解〕名广汉。）丞相奏以免罪，使人执魏丞相，欲求脱罪而不听。复使人胁恐魏丞相，以夫人贼杀侍婢事而私独奏请验之，发吏卒至丞相舍，捕奴婢笞击问之，实不以兵刃杀也。而丞相司直繁君（〔索隐〕繁，姓也，音婆。）奏京兆尹赵君迫胁丞相，诬以夫人贼杀婢，发吏卒围捕丞相舍，不道；又得擅屏骑士事，赵京兆坐要斩。又有使掾陈平等劾中尚书，疑以独擅劫事而坐之，大不敬，长史以下皆坐死，或下蚕室。而魏丞相竟以丞相病死。子嗣。后坐骑至庙，不敬，有诏夺爵一级，为关内侯，失列侯，得食其故国邑。魏丞相卒，以御史大夫邴吉代。

邴丞相吉者，鲁国人也。以读书好法令至御史大夫。孝宣帝时，以有旧故，封为列侯，而因为丞相。明于事，有大智，后世称之。以丞相病死。子显嗣。后坐骑至庙，不敬，有诏夺爵一级，失列侯，得食故国邑。显为吏至太仆，坐官耗乱，身及子男有奸赃，免为庶人。

邴丞相卒，黄丞相代。长安中有善相工田文者，与韦丞相、魏丞相、邴丞相微贱时会于客家，田文言曰：“今此三君者，皆丞相也。”其后三人竟更相代为丞相，何见之明也。

黄丞相霸者，淮阳人也。以读书为吏，至颍川太守。治颍川，以礼义条教喻告化之。犯法者，风晓令自杀。化大行，名声闻。孝宣帝下制曰：“颍川太守霸，以宣布诏令治民，道不拾遗，男女异路，狱中无重囚。赐爵关内侯，黄金百斤。”征为京兆尹而至丞相，复以礼义为治。以丞相病死。子嗣，后为列侯。

黄丞相卒，以御史大夫于定国代。于丞相已有《廷尉传》，在《张廷尉》语中。于丞相去，御史大夫韦玄成代。

韦丞相玄成者，即前韦丞相子也。代父，后失列侯。其人少时好读书，明于《诗》《论语》。为吏至卫尉，徙为太子太傅。御史大夫薛君免，（〔集解〕名广德也。）为御史大夫。于丞相乞骸骨免，而为丞相，因封故邑为扶阳侯。数年，病死。孝元帝亲临丧，赐赏甚厚。子嗣后。其治容容随世俗浮沈，而见谓谄巧。而相工本谓之当为侯代父，而后失之；复自游宦而起，至丞相。父子俱为丞相，世间美之，岂不命哉！相工其先知之。韦丞相卒，御史大夫匡衡代。

丞相匡衡者，东海人也。好读书，从博士受《诗》。家贫，衡佣作以给食饮。才下，数射策不中，至九，乃中丙科。其经以不中科故明习。补平原文学卒史。数年，郡不尊敬。御史征之，以补百石属荐为郎，而补博士，拜为太子少傅，而事孝元帝。孝元好《诗》，而迁为光禄勋，居殿中为师，授教左右，而县官坐其旁听，甚善之，日以尊贵。御史大夫郑弘坐事免，而匡君为御史大夫。岁余，韦丞相死，匡君代为丞相，封乐安侯。

以十年之间，不出长安城门而至丞相，岂非遇时而命也哉！深惟士之游宦所以至封侯者，微甚。（〔集解〕徐广曰：“微，一作‘微’。”）然多至御史大夫即去者。诸为大夫而丞相次也，其心冀幸丞相物故也。（〔集解〕高堂隆答魏朝访曰：“物，无也。故，事也。言无复所能于事。”）或乃阴私相毁害，欲代之。然守之日久不得，或为之日少而得之，至于封侯，真命也夫！御史大夫郑君守之数年不得，匡君居之未几岁，而韦丞相死，即代之矣，岂可以智巧得哉！多有贤圣之才，困厄不得者众甚也。（〔索隐〕按：此论匡衡已来事，则后人所述也，或亦称“太史公”，其序述浅陋，一何诬也！）

【索隐述赞】张苍主计，天下作程。孙臣始绌，秦历尚行。



御史亚相，相国阿衡。申屠面折，周子廷争。
其他娓娓，无所发明。

[1]“九”字原本作“元”。按：文帝后元四年上推三十九年，为高祖九年，则作“元年”误。今依金陵本改“元”为“九”。

[2]“昌”字原本作“期”，据金陵本改。

[3]“腠”字原本误作“礼”，据殿本、金陵本改。

[4]“人”下原本衍“有”字，据金陵本、《汉书》及《太平御览·职官部》引删。

[5]“谭”字原本作“谈”，据殿本、金陵本改。

[6]“新”字原本作“世”，据金陵本改。

[7]“免”字原本讹作“兔”，据殿本、金陵本改。

[8]“此”字原本讹作“皆”，据殿本、金陵本改。

[9]“说”字原本讹作“记”，据金陵本改。

[10]“十九”二字原本误倒为“九十”，据殿本、金陵本改正。

[11]“入”字原本讹作“人”，据金陵本改。

[12][14][15]“舍”字原本讹作“含”，据金陵本改。

[13]“舍”字原本讹作“含”，据殿本、金陵本改。

卷九十七

酈生陆贾列传第三十七

酈生食其者，（〔正义〕历异几三音也。）陈留高阳人也。（〔集解〕徐广曰：“今在圉县。”〔索隐〕按：高阳属陈留圉县。高阳，乡名也，故《耆旧传》云：“食其，圉高阳乡人。”〔正义〕《陈留风俗传》云：“高阳在雍丘西南。”《括地志》云：“圉城在汴州雍丘县西南。食其墓在雍丘西南二十八里。”盖谓此也。）好读书，家贫落魄，无以为衣食业，（〔集解〕应劭曰：“落魄，志行衰恶之貌也。”晋灼曰：“落薄，落托，义同也。”〔索隐〕按：郑氏云：“魄，音薄”。）为里监门吏。（〔正义〕监，音甲衫反。《战国策》云：齐宣谓颜斶^{〔1〕}曰：“夫监门间里，士之贱也。”）然县中贤豪不敢役，县中皆谓之狂生。

及陈胜、项梁等起，诸将徇地（〔正义〕徇，略也。）过高阳者数十人。酈生问其将，皆握鞞（〔集解〕应劭曰：“握鞞，急促之貌。”〔索隐〕应劭云：鞞，音若“促”。邹氏音震^{〔2〕}角反。韦昭云：“握鞞，小节也。”）好苛礼（〔索隐〕按：苛，亦作“荷”。贾逵云：“苛，烦也。”小颜云：“苛，细也。”）自用，不能听大度之言，酈生乃深自藏匿。后闻沛公将兵略地陈留郊，沛公麾下骑士适酈生里中子也，（〔集解〕服虔曰：“食其里中子适作沛公骑士。”〔索隐〕适，音释。服虔、苏林皆云：沛公骑士适是食其里中人也。按：言适近作骑士也。）沛公时时问邑中贤士豪俊。骑士归，酈生见谓之曰：“吾闻沛公慢而易人，多大略，此真吾所愿从游，莫为我先。（〔索隐〕按：先，谓先容，言无人为我作介绍也。〔正义〕为，于伪反。）若见沛公，谓曰：‘臣里中有酈生，年六十余，长八尺，人皆谓之狂生，生自谓我非狂生。’”骑士曰：“沛公不好儒，诸客冠儒冠来者，

沛公辄解其冠，溲溺其中。（〔索隐〕溲，所由反。溺，乃吊反，亦如字。溲即溺也。）与人言，常大骂。未可以儒生说也。”酈生曰：“弟言之。”骑士从容言如酈生所诫者。

沛公至高阳传舍，（〔集解〕徐广曰：“二世三年二月。”）使人召酈生。酈生至，入谒，沛公方偃床使两女子洗足，（〔索隐〕按：乐彦云：“边床曰偃”。）而见酈生。酈生入，则长揖不拜，曰：“足下欲助秦攻诸侯乎？且欲率诸侯破秦也？”沛公骂曰：“竖儒！（〔索隐〕按：竖者，僮仆之称。沛公轻之，以比奴竖，故曰“竖儒”。）夫天下同苦秦久矣，故诸侯相率而攻秦，何谓助秦攻诸侯乎？”酈生曰：“必聚徒合义兵诛无道秦，不宜偃见长者。”于是沛公辍洗，起摄衣，（〔正义〕摄，犹言敛著也。）延酈生上坐，谢之。酈生因言六国从横时。沛公喜，赐酈生食，问曰：“计将安出？”酈生曰：“足下起纠合之众，（〔集解〕一作“乌合”，一作“瓦合”。）收散乱之兵，不满万人，欲以径入强秦，此所谓探虎口者也。夫陈留，天下之冲，四通八达之郊也，（〔集解〕如淳曰：“四面中央，凡五达也。”瓚曰：“四通五达，言无险阻。”）今其城又多积粟。臣善其令，（〔正义〕言食其与陈留县令相善也。）请得使之，令下（〔正义〕令，力征反。下，谓降之也。）足下。即不听，足下举兵攻之，臣为内应。”于是遣酈生行，沛公引兵随之，遂下陈留。号酈食其为广野君。

酈生言其弟酈商，使将数千人从沛公西南略地。酈生常为说客，驰使诸侯。

汉三年秋，项羽击汉，拔荥阳，汉兵遁保巩、洛。楚人闻淮阴侯破赵，彭越数反梁地，（〔索隐〕数音朔⁽³⁾。）则分兵救之。淮阴方东击齐，汉王数因荥阳、成皋，计欲捐成皋以东，屯巩、洛以拒楚。酈生因曰：“臣闻知天之所为，王事可成；不知天之所为，王事不可成。王者以民人为天，而民人以食为天。（〔索隐〕按：此语出《管子》。）夫敖仓，天下转输久矣，臣闻其下乃有藏粟甚多。楚人拔荥阳，不坚守敖仓，乃引而东，令適卒分守成皋，（〔索隐〕適，音直革反。按：《通俗文》云，“罚罪云滴⁽⁴⁾”，即所谓滴戍。又音陟革反。卒，音租忽反。）此乃天所以资汉

也。方今楚易取而汉反却，自夺其便，（〔索隐〕以言不取敖仓，是汉却，自夺其便利。）臣窃以为过矣。且两雄不俱立，楚汉久相持不决，百姓骚动，海内摇荡，农夫释耒，工女下机，（〔索隐〕谓女工工巧也。《汉书》作“红”，音功。）天下之心未有所定也。愿足下急复进兵，收取荥阳，据敖仓之粟，（〔正义〕敖仓在郑州荥阳县西^{〔5〕}十五里，石门之东，北临汴水，南带三皇山。秦时置仓于敖山上，故名敖仓。）塞成皋之险，（〔正义〕即汜水县山也。）杜大行之道，（〔集解〕韦昭曰：“在河内野王北也。”）距蜚狐之口，（〔集解〕如淳曰：“上党壶关也。”按：蜚狐在代郡西南。〔正义〕按：蔚州飞狐县北百五十里有秦、汉故郡城，西南有山，俗号飞狐口也。）守白马之津，以示诸侯效实形制之势，则天下知所归矣。方今燕、赵已定，唯齐未下。今田广据千里之齐，田闾将二十万之众，军于历城，诸田宗强，负海阻河济，南近楚，人多变诈，足下虽遣数十万师，未可以岁月破也。臣请得奉明诏说齐王，使为汉而称东藩。”上曰：“善。”

乃从其画，复守敖仓，而使酈生说齐王曰：“王知天下之所归乎？”王曰：“不知也。”曰：“王知天下之所归，则齐国可得而有也；若不知天下之所归，即齐国未可得保也。”齐王曰：“天下何所归？”曰：“归汉。”曰：“先生何以言之？”曰：“汉王与项王戮力西面击秦，约先入咸阳者王之。汉王先入咸阳，项王负约不与而王之汉中。项王迁杀义帝，汉王闻之，起蜀汉之兵击三秦，出关而责义帝之处，收天下之兵，立诸侯之后。降城即以侯其将，得赂即以分其士，与天下同其利，豪英贤才皆乐为之用。诸侯之兵四面而至，蜀汉之粟方船而下。（〔索隐〕按：方船，谓并舟也。《战国策》云：“方船积粟，循江而下”也。）项王有倍约之名，杀义帝之负；于人之功无所记，于人之罪无所忘；战胜而不得其赏，拔城而不得其封；非项氏莫得用事；为人刻印，刳而不能授；（〔集解〕孟康曰：“刳断无复廉铎也。”瓚曰：“项羽吝于爵赏，玩惜侯印，不能以封其人也。”〔索隐〕刳，音五官反。按：郭象注《庄子》云：“立法而刳断无圭角。”《汉书》作“玩”，言玩惜不忍授人。）攻城得赂，积而不能赏；天



下畔之，贤才怨之，而莫为之用。故天下之士归于汉王，可坐而策也。夫汉王发蜀汉，定三秦，涉西河之外，援上党之兵；（〔正义〕援，音爰。）下井陘，诛成安君；破北魏，举三十二城；（〔索隐〕北魏，谓魏豹。豹在河北故也。亦谓“西魏”，以大梁在河南故也。）此蚩尤之兵也，非人之力也，天之福也。今已据敖仓之粟，塞成皋之险，守白马之津，杜大行之阪，距蜚狐之口，天下后服者先亡矣。王疾先下汉王，齐国社稷可得而保也；不下汉王，危亡可立而待也。”田广以为然，乃听酈生，罢历下兵守战备，与酈生日纵酒。

淮阴侯闻酈生伏轼下齐七十余城，乃夜度兵平原袭齐。齐王田广闻汉兵至，以为酈生卖己，乃曰：“汝能止汉军，我活汝；不然，我将亨汝！”酈生曰：“举大事不细谨，盛德不辞让。而公不为若更言！”齐王遂亨酈生，引兵东走。

汉十二年，曲周侯酈商以丞相将兵击黥布有功。高祖举列侯功臣，思酈食其。酈食其子疥数将兵，功未当侯，上以其父故，封疥为高梁侯。后更食武遂，嗣三世。（〔索隐〕疥，音界。《地理志》：武遂属河间。按：《汉书》作“武阳子遂”，衍字，误也。）元狩元年中，武遂侯平（〔正义〕年表云：“卒，子勃^{〔6〕}嗣。卒，子平嗣。元年，有罪，国除”。而《汉书》云“更食武阳，子遂嗣”，恐《汉书》误^{〔7〕}也。）坐诈诏衡山王取百斤金，当弃市，病死，国除也。

陆贾者，楚人也。（〔索隐〕按：《陈留风俗传》云：“陆氏，春秋时陆浑国之后。晋侯伐之，故陆浑子奔楚。贾，其后”。又《陆氏谱》云：“齐宣公支子达，食菜于陆乡，号曰陆侯。达生发，发生皋，适楚。贾，其孙也”。）以客从高祖定天下，名为有口辩士，居左右，常使诸侯。

及高祖时，中国初定，尉他平南越，因王之。（〔索隐〕赵他为南越尉，故曰“尉他”。他，音驰。）高祖使陆贾赐尉他印为南越王。陆生至，尉他魃结（〔集解〕服虔曰：“魃，音椎。今兵士椎头结。”〔索隐〕魃，直追反。结，音计。谓为髻一撮以椎而结之，故字从结。且按其“魃结”

二字，依字读之亦通。谓夷人本被发左衽，今他同其风俗，但勉其发而结之也。）箕倨见陆生。陆生因进说他曰：“足下中国人，亲戚昆弟坟墓在真定。（〔索隐〕赵地也。本名东垣，属常山。）今足下反天性，弃冠带，欲以区区之越与天子抗衡为敌国，（〔索隐〕按：崔浩云：“抗，对也。”衡，车扼上横木也。抗衡，言两衡相对拒，率不相避下也。）”祸且及身矣。且夫秦失其政，诸侯豪桀并起，唯汉王先入关，据咸阳。项羽倍约，自立为西楚霸王，诸侯皆属，可谓至强。然汉王起巴蜀，鞭笞天下，劫略诸侯，遂诛项羽灭之。五年之间，海内平定，此非人力，天之所建也。天子闻君王王南越，不助天下诛暴逆，将相欲移兵而诛王，天子怜百姓新劳苦，故且休之，遣臣授君王印，剖符通使。君王宜郊迎，北面称臣，乃欲以新造未集之越，倔强于此。汉诚闻之，掘烧王先人冢，夷灭宗族，使一偏将将十万众临越，则越杀王降汉，如反覆手耳。”

于是尉他乃蹶然起坐，（〔索隐〕苏林音厥。《礼记》：“子夏蹶然而起。”《埤苍》云：“蹶，起也。”）谢陆生曰：“居蛮夷中久，殊失礼义。”因问陆生曰：“我孰与萧何、曹参、韩信贤？”陆生曰：“王似贤。”复曰：“我孰与皇帝贤？”陆生曰：“皇帝起丰沛，讨暴秦，诛强楚，为天下兴利除害，继五帝三皇之业，统理中国。中国之人以亿计，地方万里，居天下之膏腴，人众车舆，万物殷富，政由一家，自天地剖泮未始有也。今王众不过数十万，皆蛮夷，崎岖山海间，譬若汉一郡，王何乃比于汉！”尉他大笑曰：“吾不起中国，故王此。使我居中国，何渠不若汉？”（〔集解〕渠，音詎。〔索隐〕《汉书》作“遽”字，小颜以为“有何迫切而不如汉也”。）乃大说陆生，留与饮数月。曰：“越中无足与语，至生来，令我日闻所不闻。”赐陆生橐中装直千金，（〔集解〕张晏曰：“珠玉之宝也。装，裹也。”〔索隐〕橐，音托。按：如淳云：“以为明月珠之属。”又按：《诗传》曰：“大曰橐，小曰囊。”《埤苍》云：“有底曰囊，无底曰橐。”谓以宝物装裹以入囊也。）他送亦千金。（〔集解〕苏林曰：“非橐中物，故曰‘他送’也。”）陆生卒拜尉他为南^{〔8〕}越王，令称臣奉汉约。归报，高祖大悦，拜贾为太中大夫。



陆生时时前说称《诗》《书》。高帝骂之曰：“乃公居马上而得之，安事《诗》《书》！”陆生曰：“居马上得之，宁可以马上治之乎？且汤、武逆取而以顺守之，文武并用，长久之术也。昔者吴王夫差、智伯极武而亡；秦任刑法不变，卒灭赵氏。（〔集解〕赵氏，秦姓也。〔索隐〕按：韦昭云：“秦，伯繁后，与赵同出非廉，造父有功周缪王，封之赵城，由此一姓赵氏。”）乡使秦已并天下，行仁义，法先圣，陛下安得而有之？”高帝不怩而有惭色，乃谓陆生曰：“试为我著秦所以失天下，吾所以得之者何，及古成败之国。”陆生乃粗述存亡之征，凡著十二篇。每奏一篇，高帝未尝不称善，左右呼万岁，号其书曰《新语》。（〔正义〕《七录》云：“《新语》二卷，陆贾撰也。”）

孝惠帝时，吕太后用事，欲王诸吕，畏大臣有口者，陆生自度不能争之，乃病免家居。以好畤田地善，（〔正义〕畤，音止。雍州县也。）可以家焉。有五男，乃出所使越得橐中装卖千金，（〔正义〕汉制，一金直千贯。）分其子，子二百金，令为生产。陆生常安车驷马，从歌舞鼓琴瑟侍者十人，宝剑直百金，谓其子曰：“与汝约：（〔集解〕徐广曰：“汝，一作‘公’。”）过汝，汝给吾人马酒食，极欲，十日而更。所死家，得宝剑车骑侍从者。一岁中往来过他客，率不过再三过，（〔索隐〕率，音律。过，音戈。其下“过”字音光卧反。）数见不鲜，（〔索隐〕数见，音朔现^[9]，谓时时来见汝也。不鲜，言必令鲜美作食，莫令见不鲜之物也。《汉书》作“数击鲜”，如淳云：“新杀曰鲜也。”）无久恩公为也。”（〔集解〕韦昭曰：“恩，污辱。”〔索隐〕恩，患也。公，贾自谓也。言汝诸子无久厌患公也。）

吕太后时，王诸吕，诸吕擅权，欲劫少主，危刘氏。右丞相陈平患之，力不能争，恐祸及己，常燕居深念。陆生往请，（〔集解〕《汉书音义》曰：“请，若问起居。”）直入坐，而陈丞相方深念，不时见陆生。（〔索隐〕深念，深思之也。）陆生曰：“何念之深也？”陈平曰：“生揣我何念？”（〔集解〕孟康曰：“揣，度也。”韦昭曰：“揣，音初委反。”）陆生曰：“足下位为上相，食三万户侯，（〔索隐〕按：《陈平传》食户五千，以曲逆